



2022-2

17. maj 2022

All. nr./notatnr.:

2021-302-0001-23

Sull./sagsbeh.: MS/jh

Soraarnermi ajunngitsorsiat pillugit allagaatinik paasitinneqarumalluni qinnutigisap itigartinneqarnissaanik kommunip aalajangiinera isorisarialik

Tusagassiortup A-p aningaasat kommunimi pisortaanerusimasumut B-mut taassuma kommunimi atorfimminit soraarneranut atatillugu tunniunneqartut pillugit allagaatinik paasitinneqarumalluni kommunimut 28. juli 2021-mi qinnutigaa.

Kommunip allagaatinik paasitinneqarumalluni qinnutigisap taanna 3. august 2021-mi itigartippaa.

Kommunip itigartitsinera A-p Ombudsmandimut 18. august 2021-mi naammagittaalliuutigaa.

Ombudsmandi isumaqarpoq kommuni allagaatinik paasitinneqarumalluni qinnutigisamik 28. juli 2021-meersumik paasitinneqarsinnaatitaaneq pillugu inatsimmi § 2, imm. 3, § 12, imm. 1, nr. 1 imaluunniit § 13, imm. 1, nr. 6 tunngavigalugit itigartitsissutiginnissinnaanngitsoq.

Ombudsmandi taamatuttaaq isumaqarpoq kommunip aalajangiinermut 3. august 2021-meersumut tunngavilersuutaa amigaateqartoq, tassami

- kommunip aalajangersagaq aalajangiinermut tunngavigisani erseqqissumik innersuussutigisimanngimmagu,*
- kommunip soraarnermi ajunngitsorsiassat pillugit paasissutissaq paasissu-*

tissatut misikkarissutut/ersertuussassatut sooq isiginerini nassuiarsimanngimmagu aamma

- *aalajangiineq kommunip isumaliutersuutigisimasarpiaanik takutitsisuuningimmat, kommunimmi Ombudsmandimut oqaaseqaatimini arlalinni pissut-sit aalajangiinermi eqqaaneqarsimannngitsut oqaatigimmagit.*

Ombudsmandi oqarpoq kommunip aalajangiinera ataatsimut isigalugu isorisa-rialiusoq.

Taamaattumik suliaq kommunip suliareqqissagaa Ombudsmandip inassuti-gaa.

(Oqaaseqaat 17. maj 2022-meersoq, tak. j.nr. 2022-302-001-21)

1. Suut misissorpakka?

1.1. Aningaasat B-mut taassuma kommunimi atorfimminit soraarneranut atatil-lugu tunniunneqartut pillugit allagaatinik tusagassiortup A-p allagaatinik paasitin-neqarumanerata 28. juli 2021-meersup itigartinneqarnissaanik kommunip aala-jangiinera 3. august 2021-meersoq misissorpara.

Kommunip allagaatinik paasitinneqarumanermik qinnutigisap paasitinneqarsin-naatitaaneq pillugu inatsimmi § 2, imm. 3 tunngavigalugu itigartinneqarnissaanut tunngavilersuutaa kommunillu allagaatinik paasitinneqarumanermik qinnutigi-sap paasitinneqarsinnaatitaaneq pillugu inatsimmi § 12, imm. 1, nr. 1 aamma § 13, imm. 1, nr. 6 tunngavigalugit itigartinneqarnissaanut periarfissatut allatut taasai isummerfigaakka.

Matumani Inatsisartut Ombudsmandiat pillugu Inatsisartut inatsisaanni nr. 7-imi, 1. juni 2017-imeersumi (matuma kingornatigut Ombudsmandi pillugu inatsimmik taaneqartartussami) § 14, imm. 1 innersuussutigaa, tassuunalu aalajanger-sarneqarpoq naammagittaalliuut misissuinerimik aallartitsinerimut pissutigissal-lugu naammannersoq Ombudsmandip aalajangissagaa.

1.2. Ajornartorsiutitik taamaattunik siusinnerusukkut nammineq suliarinnissimangikkaangama Danmarkimi atuakkiaasimasut aamma Folketingip Ombudsmandiata periaasia oqaaseqaatinni arlalitsigut aallaavigisarpakka. Kalaallit Nunaanni inatsiseqartitsinikkut tunngaviusup Danmarkimilu inatsiseqartitsinikkut tunngaviusup pingaarnerusutigut assigiinnerat tamatumunnga pissutaavoq. Kalaallit Nunaanni inatsiseqartitsinikkut tunngavik Danmarkimi inatsiseqartitsinikkut tunngavimmit allaasoq isumaqaraangama tamanna oqaatigisarpara.

Oqaaseqaatiga imatut tulleriinnilerneqarpoq:

- Immikkoortoq 2. Suliap naatsumik allaaserineqarnera
- Immikkoortoq 3. Inatsiseqartitsinikkut tunngavigisaq
- Immikkoortoq 4. Kommunip isumaa
- Immikkoortoq 5. Uanga naliliinera
- Immikkoortoq 6. Eqikkaalluni inerniliineq

Oqaatigaara suliap ingerlasimanerata allaaserineqarnera oqaaseqaammut tulliummat.

2. Suliap naatsumik allaaserineqarnera

Aningaasat B-mut taassuma kommunimi atorfimminit soraarneranut atatillugu tunniunneqartut pillugit allagaatinik paasitinneqarnissani A-p kommunimut 28. juli 2021-mi qinnutigaa.

A-p suliame allagaatinik paasitinneqarumalluni qinnutigisaa kommunip 3. august 2021-mi itigartippaa.

Kommunip itigartitsinera A-p uannut 18. august 2021-mi naammagittaalliutigaa.

3. Inatsiseqartitsinikkut tunngavigisaq

3.1. Allagaatinik paasissutissiisarneq

Suliani sulisunut tunngasuni allagaatinik paasissutissiisarneq paasitinneqarsinnaatitaaneq pillugu Inatsisartut inatsisaatigut nr. 9-kkut, 13. juni 1994-imeersukkut (matuma kingornatigut paasitinneqarsinnaatitaaneq pillugu inatsimmik taaneqartartussakkut), paasitinneqarsinnaatitaaneq pillugu Inatsisartut inatsisaata allanngortinneqarneranik inatsikkut nr. 1-ikkut, 31. maj 1999-imeersukkut (sulisorineqartut pillugit paasissutissanik paasitinneqarsinnaanermut tunngasukkut) allannguuteqartinneqarsimasukkut aalajangersaavigineqarpoq.

3.1.1. Paasitinneqarsinnaatitaaneq pillugu inatsimmi § 2

Paasitinneqarsinnaatitaaneq pillugu inatsimmi § 2, imm. 2-kkut 3-kkullu makku aalajangersarneqarput:

“§ 2. [...]

Imm. 2. Aammattaaq sulianut pisortani sulisunik atorfinitsitsinernut imaluunniit pisortani atorfinnut qaffasinnerusunut qaffatsinneqarnernut tunngasunut inatsit atuutinngilaq, § 6-imi aalajangersagaq eqqaassanngikkaanni. Tamanna paasissutissanut inuit ataasiakkaat pisortani atorfeqarnerannut tunngassuteqartunut aamma atuuppoq, taamaattorli imm. 3 aamma § 4, imm. 2 takuuk.

Imm. 3. Suliani imm. 2-mi oqaaseqatigiit aappaanni taaneqartuni atorfeqartup aqqa, atorfia, ilinniagaqarnera, suliassai, akissarsiai suliarmullu atatillugu angalaneri pillugit paasissutissanut inatsit atuuppoq. Aammattaaq pisortatut atorfinni atorfinitsinneqartut eqqarsaatigalugit inatsit suliarmut atatillugu mianersoqqussutit iliuuserisallu taakkunanga sakkortunerusunut pillugit paasissutissanut atuuppoq. Taamaattorli tamakku pillugit inaarutaasumik aalajangiinermut ukiuni marlunni taamaallaat tamanna atuuppoq.

[...]”

Suliani sulisunut tunngasuni allagaatinik paasissutissiisarnermi aallaavik paasitinneqarsinnaatitaaneq pillugu inatsimmi § 2, imm. 2-kkut aalajangersarneqarpoq. Tassani oqaatigineqarpoq inatsit sulianut pisortani sulisutut atorfinitsitsinermut suliffimmilu qaffatsitsinernut tunngasunut atuutinngitsoq. Inatsit inuit ataasiakkaat pisortani sulisutut atorfeqartitaanerinut tunngasuni allani aamma atuutinngilaq.

Atorfinitsitsineq atorfimmilu qaffatsitsineq pillugit paasissutissiineq soorlu suliat sulisut suliunnaarsinneqarnerinut, soraarsinneqarnerinut naalasseriitsuliornerlu pissutigalugu malersuinerlut tunngasut nalinginnaasut pineqartunut ilaalersillugit annertusineqarsinnaanngilaq, taamaattumillu suliat taakku paasitinneqarsinnaatitaaneq pillugu inatsisip atuuffiani pineqartunut suli ilaatinneqarlutik. Folke-tingip Ombudsmandiata ukiumoortumik nalunaarutaa (matuma kingornatigut FOB-imik taaneqartartussaq) 1998.431 innersuussutigaa.

Ilaatitsinngiffiit arlallit paasitinneqarsinnaatitaaneq pillugu inatsimmi § 2, imm. 3-mi taagorneqarput. Oqaatigineqarpoq paasitinneqarsinnaatitaaneq pillugu inatsit atorfeqartitaasup aqqa, atorfia, suliassai, akissarsiaqartitaaneranut tunngasut sulinernullu atatillugu angalasarneri pillugit paasissutissanut atuuttoq.

Inatsimmi § 2, imm. 3 pillugu oqaaseqaatini ilaatigut makku akissarsianut tunngasut pillugit oqaatigineqarput:

“[...]

Aalajangersagaq taanna malillugu siullermik paasissutissat “nalinginnaanerusut” arlallit inatsimmi pineqartunut ilaatinneqarput. Tassani pineqartut tassaapput atorfeqartup aqqa, atorfia, ilinniagaqarnera, suliartisartagai, akissarsiaanut tunngasut sulinernullu atatillugu angalaneri pillugit paasissutissat.

[...]

Aammattaaq paasissutissat akissarsianut tunngasut inatsimmi pineqartunut ilaatinneqarput. Tamanna tunngaviusumik akissarsiaannarnut il.il. atuutinngilaq, aammali qaangiuttoornerianut, piukkunnaateqarnermut immikkullu suliaqarnermut tapisianut, tapisianut immikkut ittunut, **soraarnermi ajunngitsorsianut** soraarnerussutisianullu il.il. atuulluni. Tamatumunnga tapertaliullugu sulinerlut atatillugu angalanerit pillugit paasissutissat inatsimmi malittarisassat nalinginnaasut malillugit paasissutissiissutigineqarsinnaapput, matumani ilaatigut angalanerimi siumoorutit naatsorsuusiorneqartarneri ilanngullugit eqqarsaatigalugit. **Kisianni assersuutigalugu tapisianik tunineqarneq imaluunniit soraarnermi ajunngitsorsiat pillugit isumaqatigiissuteqarnermi tunngaviusut erseqqinnerusut pineqartunut ilaatinneqanngillat.**

[...]” (Uanga erseqqissaanera)

Inatsisilerineq pillugu atuakkiaasimasuni “tunngaviusut erseqqinnerusut” pillugit ilaatigut makku oqaatigineqarput:

“[...]

Naak suliat sulisunut tunngasut pineqartut paasitinneqarsinnaatitaaneq pillugu inatsisip atuuffiani, taamalu paasissutissiinermi, § 2, imm. 2-mi oqaaseqatigiit aappaasigut ataatsimut ilaatinneqanngikkaluartut inatsit (taassumalu ilaatitsinnginnissaq pillugu aalajangersagartai nalinginnaasut) sulisup aqqa, atorfia, ilinniarsimanera, suliassai, akissarsiaanut tunngasut sulinernullu atatillugu angalasarneri pillugit paasissutissanut § 2, imm. 3 tunngavigalugu atuuppoq. [...]

[...]

Inatsisissatulli siunnersuut pillugu oqaaseqaatini oqaatigineqarpoq tapiliineq imaluunniit soraarnermut atatillugu ajunngitsorsiassaqaartitsineq pillugu isumaqatigiissuteqarnerit pillugit paasissutissat aalajangersakkami pineqartunut ilaatinneqanngitsut. Tamatuma pissuseqataa isumaginninneq pillugu inatsit tunngavigalugu tapiissutit pillugit aaqqissuussinerit pillugit paasissutissanut, tak. § 12, imm. 1, nr.1, paasissutissanullu tunuliaqutaasunut atuutissasoq ilimagineqartariaqarpoq, matumani peqqissuseq pillugu paasissutissat soraarnerussutisiassanillu naatsorsuinerit ilanngullugit eqqarsaattigalugit.

[...]” (Ombudsmandeqarfimmi nutsigaavoq)

John Vogterip atuakkiaani “Offentlighedsloven med kommentarer”-mi pingajussaanik (1998-imi) naqitertinneqartumi quppernerit 100-101 innersuussutigaa-ka.

Inatsisilerineq pillugu atuakkiaasimasunit makku aammattaaq erserput:

“[...]

Akissarsianut tunngasut pillugit paasissutissani – tunngaviusumik aningaasartat oqaatigineqarnerisa saniatigut – paasissutissat qaangiuttoornerianut, piukkunnaateqarnermut sulinernullu tapinut kiisalu soraarnermi ajunngitsorsianut soraarnerussutisia- nullu tunngasut pineqartunut ilaatinneqarput. Paasitinneqarsinnaatitaanermi akissarsiat aningaasartaasa amerlassusiat suussusiallu pillugit paasissutissat kisimik pineqartunut ilaatinneqarput, tunniussinermulli tunngaviusoq pillugu paasissutissat – matumani soorlu soraarnermi ajunngitsorsisitsisoqarnissaanik isumaqatigissuteqarneq ilanngullugu eqqarsaatigalugu – aalajangersakkami pineqartunut ilaatinneqaratik.

[...]” (Ombudsmandeqarfimmi nutsigaavoq)

Steen Rønsholdtip atuakkiaani ”Forvaltningsret, Retssikkerhed, Proces, Sagsbehandling”-imi tallimassaanik (2018-imi) naqitertinneqartumi qupperneq 328 innersuussutigaaara.

3.1.2. Paasitinneqarsinnaatitaaneq pillugu inatsimmi § 12, imm. 1, nr. 1

Makku paasitinneqarsinnaatitaaneq pillugu inatsimmi § 12, imm. 1, nr. 1-ikkut aalajangersarneqarput:

”§ 12. Paasitinneqarsinnaatitaanermi paasissutissat makku ilaatinneqanngillat:

1) inuit ataasiakkaat inuuneri pillugit paasissutissat, matumani aningaasaqarnerannut tunngasut ilanngullugit,

[...]”

Paasitinneqarsinnaatitaaneq pillugu inatsimmi § 12, imm, 1, nr. 1-ikkut aalajangersarneqarpoq paasissutissat inuit ataasiakkaanut inuunerinut tunngasut, matumani pissutsit aningaasaqarnermut tunngasut ilanngullugit eqqarsaatigalugit, paasitinneqarsinnaatitaanermi pineqartunut ilaatinneqanngitsut. Isertuussisoqassappat soqutigisanik pineqartumi oqimaalutaasoqarnissaanik piumasaqaateqanngilaq, taamaallaalli allagaatinik paasitinneqarumalluni qinnutigisami allagaatit paasissutissanik inuit ataasiakkaat inuunerinut, matumani aningaasaqarnerinut tunngasut ilanngullugit eqqarsaatigalugit, tunngasunik imallit paasisaqarfigiumaneqarnerat ilanngullugu oqaatigineqarsimassalluni.

Makku paasitineqarsinnaatitaaneq pillugu inatsimmi § 12 pillugu oqaaseqaatinit erserput:

"[...] Ilaatinneqartussaannngitsut inuinnaat eqqissisimatinneqarnissaat namminersortullu inuussutissarsiutitigut soqutigisaat il.il. eqqarsaatigalugit tunngavilersorneqarsimapput.

Nr. 1 tunngavigalugu paasitineqarsinnaatitaanermi inuit ataasiakkaat inuunerinut tunngasut, matumani aningaasaqarnermut tunngasut ilanngullugit eqqarsaatigalugit, pineqartunut ilaatinneqanngillat. Oqaaseq "ataasiakkaat inunneri pillugit" "ataasiakkaat inuttut atugaat"-nut inatsimmi atuuttumi atorneqartumut taarsiullugu atoruma-neqarsimavoq. Allannguummi tassani siunertarineqarpoq **killiliinermi aalajangersarneqassasoq ilaatitsinnginnissami paasissutissat suut ilaatinneqarsinnaanersut, pingaartumik paasissutissat "mianernartuutillugit", tassa inuiaqatigiinni paasinnittarneq nalinginnaasoq tunngavigalugu tamanit ilisimaneqalernissaasa pinngitsoortinneqarnissaat piumasarineqartariaqarluni.** Oqaaser-tanik allannguinikkut ilaatitsinnginnissamut aalajangersakkap atuuffigisinnaasai anni-killiallatsinneqarput.

Ilaatitsinngitsoorsinnaaneq tunngavimmigut paasissutissat qanoq ittuussu-siannik ataatsimut isigalugu naliliinermik ilaqartinneqartussaavoq.

Pisuni ataasiakkaani isertuussinissaq piumasaqarineqartariaqartoq inatsim-mi atuuttumisulli aalajangersakkap atorneqarnissaani piumasaqaataavoq.

Taamaattorli illua'tungaani aamma imaassinnaavoq paasissutissani pineqartup immik-kut erseqqissarsimagaa paasissutissaq taamaattoq inuup inuinnartut eqqissilluni inuu-nissaata illersorneqarneranut ilaatikkusukkini. Pisut tunngavigalugit tamanna paasis-sutissap taassuma aalajangersagaq manna tunngavigalugu ilaatinneqannginnissaanut tunngavilersuutaasinnaavoq. Assersuutigalugu tamanna telefonit normui isertortut inuillu nalunarsorneqarfianni adressit illersugaanerit eqqarsaatigalugit atuuppoq.

[...]" (Uanga erseqqissaanikka)

Inatsisilerineq pillugu atuakkiaasimasuni taamatuttaaq oqaatigineqarpoq aalaja-ngersagaq taanna "allagaatini paasissutissanik paasissutissiineq inummut paasis-sutissani pineqartumut ajoqusiisinnaanermik pineqartumi imaqarnerat apeqqu-taatinnagu atuuttoq".

Jon Andersenip allallu atuakkiaanni "Forvaltningret"-imi appassaanik (2002-mi) naqitertinneqartumi qupperneq 423 aamma FOB 2005.465 innersuussutigaaakka.

Inatsisilerineq pillugu atuakkiaasimasuni aamma oqaatigineqarpoq:

"[...]

Inuup aalajangersimasumik amerlassusilini aningaasartaqartumik pisortanit pisartaqarsimanera pillugu paasissutissaq immi aalajangersagaq tunngavigalugu ilaatinneqanngissinnaasusnaanngilaq, paasissutissaq taanna pineqartup nammineq aningaasqarniarnera pillugu isertuussassamik arlaatigut saqqummiussisuunngippat.

[...]" (Ombudsmandeqarfimmi nutsigaavoq)

John Vogterip atuakkiaani "Offentlighedsloven med kommentarer"-mi (1992-imeersumi) qupperneq 187 innersuussutigaaara.

Paasitinneqarsinnaatitaaneq pillugu inatsimmi aalajangersakkat pinngitsoorati malinneqartussaapput, tassa imaappoq isumaqatigiissuteqarnikkut saneqqunneqarsinnaanngillat. Taamaalluni oqartussaasoq malunnaarsaarnissamik/qajassuussinissamik neriorsuuteqarsinnaanngilaq, kinaassutsip isertuunneqarnissaa-nik isumaqatigiissuteqarsinnaanani imaluunniit siunissami allagaatinik paasitinneqarumanerup itigartinneqarnissaa innersuussutigisinnaanagu. Innuttaasup paasissutissaq allagaatinik paasissutissiiner-mi malunnaarsaarnissaq/qajassuussinissaq pissutigalugu ilaatinneqassanngitsoq taamatuttaaq piumasaqaatigisinnaanngilaa.

FOB 1997.108, Jon Andersenip allallu atuakkiaanni "Forvaltningsret"-imi 2002-meersumi qupperneq 425 aamma Jon Vogterip atuakkiaani "Offentlighedsloven med kommentarer"-mi (1992-meersumi) qupperneq 181 innersuussutigaaakka.

3.1.3. Paasitinneqarsinnaatitaaneq pillugu inatsimmi § 13, imm. 1, nr. 6

Paasitinneqarsinnaatitaaneq pillugu inatsimmi § 13, imm. 1., nr. 6-ikkut makku aalajangersarneqarput:

“§ 13. Paasitinneqarsinnaatitaaneq killilerneqarsinnaavoq, tamanna pisariaqarpat makku immikkut eqqarsaatigineqarnissaasa illersorneqarnissaannut:

[...]

6) namminersortut pisortallu soqutigisaat, pineqartup pissusia immikkut ittoq pissutigalugu isertuussinissaq pisariaqarpat.

[...] ”

Aalajangersagaq taanna atorneqassappat isiniagassat taaneqartut taakku pisumi naliliiffigineqarnissaat piumasaqaataavoq. Aalajangersagaq taanna atorneqassappat isiginiagassat paasissutissap allagaatinik paasissutissiinermi ilaatinneqannginnissaanut tunngavilersuutaasinnaasut annertuumik oqimaassuseqarlutik atuutissasut aammattaaq piumasaqaataavoq. FOB 2004.114 innersuussutigaa.

Danmarkimi paasitinneqarsinnaatitaaneq pillugu inatsimmi 1970-imeersumi § 2, imm. 2, nr. 4-p oqaasertai Kalaallit Nunaanni paasitinneqarsinnaatitaaneq pillugu inatsimmi atuuttumi § 13, imm. 1, nr. 6-ip oqaasertaasa assigaat. Danmarkimi paasitinneqarsinnaatitaaneq pillugu inatsit 1970-imeersoq pillugu oqaaseqaatinit makku erserput:

“[...] Aalajangersakkap taamaallaat pisuni oqartussaasup inuilluunniit ataasiakkaat soqutigisaat eqqarsaatigalugit isertuussinissap **erseqqissumik pisariaqartinneqarfigisaanni** atorneqartarnissaa naatsorsuutigineqarpoq.

[...]” (Uanga erseqqissaanera)”

Makku inatsisilerineq pillugu atuakkiaasimasunit erserput:

“[...] Paasitinneqarsinnaatitaaneq pillugu inatsisissatut sinnersuummi 1970-imeersumi assersuusiorsimaneq qularutissaanngitsumik tamakkiisuunngilaq. Taaneqartut saniatigut illersuinissamut soqutigisat allat ilanngunneqarsinnaapput. **Taamaalilluni soqutigisat qanoq ittut taamaattoqarnerani ataatsimut aalajangersakkap atorneqarnera aqqutigalugu isumagineqarsinnaanerannik siumut erseqqivissumik killilersuisoqarsinnaagunangilaq.** Paasissutissiisinaanerup soqutigisat inatsimmi taaneqartut avataanniittut eqqarsaatigalugit killilerneqarnissaannik apeqqut piuppat illersuinissamik pisariaqartitat sakkortussusiat eqqarsaatigalugu sakkortunerusunik piumasaqaateqartoqartariaqassaaq. [...]” (Uanga erseqqissaanera)

John Vogterip atuakkiaani "Offentlighedsloven med kommentarer"-mi pingajus-
saanik (1998-imi) naqitertinneqartumi qupperneq 252 innersuussutigaa.

Folketingip Ombudsmandiata makku akissarsianut tapit pillugit FOB 1998.431-mi
oqaatigai:

"[...]

Takuneqarsinnaasutut inatsisissatut siunnersuummi immikkut tapit, piukkunnaateqar-
nermut tapit sulinermilu akissarsiat paasissutissatut tamanut soqutiginaateqavissutut
isigineqarnertik ilisarnaatigaat.

Inunnut ataasiakkaanut tapit paasissutissat inunnut ataasiakkaanut tunngasut, soorlu
piukkunnaateqarnermut tapit, sulineq, angusat il.il. pillugit paasissutissat aallaaviga-
lugit aalajangersarneqartarpata tapit aningaasartaasa amerlassusii eqqarsaatigalugit
tapit amerlassusiisa paasissutissiissutigineqarnerisa inuit ataasiakkaarlugit assigiin-
ngisitaartunik akissarsiaqartitsinerup ajornakusoornerulernissaata paasissutissiissuti-
gineqarnerata § 13, imm. 1, nr. 5 immaqalu nr. 6 tunngavigalugit tunniukkumane-
qannginnissaannut tunngavilersuutaasinnaanera ilimanannginnerusorinarpoq.

[...]” (Ombudsmandeqarfimmi nutsigaavoq)

3.2. Tunngavilersuut pillugu piumasaqaatit

Tunngavilersuisarneq pillugu malittarisassat pisortat ingerlatsineranni suliassat
suliarineqartarnerat pillugu Inatsisartut inatsisaanni nr. 8-mi, 13. juni 1994-i-
meersumi kingusinnerusukkut allannguuteqarsimasumi (matuma kingornatigut
suliassat suliarineqartarnerat pillugu inatsimmik taaneqartartussami) ilaatigut
§§-tigut 22-kkut aamma 24-kkut imaattunik oqaasertaqartutigut aalajangersar-
neqarput:

“§ 22. Aalajangiineq allakkatigut nalunaarutigineqaruni aalajangiinermut tunngaviu-
sumik ilaqartinneqassaaq, suliameq peqataasumut tassunga tapersiisuulluinnanngik-
kuni.

[...]

§ 24. Aalajangiinermut tunngaviusumik nalunaarummi innersuussutigineqassapput i-natsisini maleruaqqusat aalajangiinermi tunngavigineqartut. Maleruaqqusat tamakku malillugit aalajangiineq oqartussaasuni sulisut isumaannik tunngaveqarpap tunngaviu-sumik nalunaarummi taaneqassapputtaaq pissutaasut pingaarnerusut isummat ta-makkua atornerannut aalajangiisuunerusut.

Imm. 2. Tunngaviusumik nalunaarummi pisariaqarpap naatsumik erseqqissarneqas-sapputtaaq paasissutissat suliami pissusiviusunut tunngasut aalajangiinermi anner-tuumik pingaartinneqartut.

Imm. 3. [...]”

Makku suliasat suliarineqartarnerat pillugu inatsit pillugu oqaaseqaatinit ilaatigut erseerput:

“Tunngavilersuut nassuiaataassaaq aalajangiinerup sooq taama imaqarneranut.

Tunngavilersuutip, aalajangigaq pillugu nalunaarutigineqartussap, oqartussaasumit qanoq erseqqissarneqarluartigisariaqarnera eqqoqqissaartumik allaaserineq ajornar-poq. Akissutissap qanoq ittuunissaanut ilaatigut aalajangiisuusariaqarpoq suliami il-lua’tungiusup akineqartussap suliap suliarineqarnerani suliallu pissusianut qanoq su-leqataalluartigisimanera. Taamaattumik aalajangersakkani killilerneqarput (aalajangi-i-nermut) tunngavilersuut pillugu nalunaarutigineqartussat.

[...]

Imm. 2 malillugu tunngavilersuummik nalunaarummi pisariaqarpap naatsumik erseq-qissarneqassapputtaaq paasissutissat suliami pissusiviusunut tunngasut, aalajangi-i-nermi annertuumik pingaartinneqartut. Oqartussaasut suliami pisimasuiit pillugit isu-maat qanoq annertutigisumik erseqqissartaqarnera isummerfigissagaanni ilaatigut paaseqqaartariaqarpoq tamanna isumaqatigiinngissutaasimannginnersoq, kiisalu aamma suliami illua’tungiusoq tamatuminnga ilisimasaqareersimannginnersoq, soorlu suliamut tunngasumik paasitinneqarnissamik qinnuteqaatimi siusinnerusukkat akueri-neqarneranut atasumik.”

Tunngavilersuut eqqortuussaaq, imatut paasillugu oqartussaasup isumaliuter-suutigisimasarpiaanik takutitsisuussasoq. Isiginiagassat oqartussaasup pingaar-tillugit isiginiarsimasai tamarmik tungavilersuummi oqaatigineqassapput, oqar-

tussaasullu pisut pingaartillugit isiginiarneqarsimanngitsut tunngavilersuummi erseqqissassanngilai.

Missingiussilluni naliliinikkut aalajangiinerit eqqarsaatigalugit pingaarnertut isiginiagassat missingiusilluni naliliinermi aalajangiisuusimasut tunngavilersuummi aamma oqaatigineqassapput.

Tunngavilersuut tamanna pisariaqarpat taakkua saniatigut suliami pissusiviusut pillugit paasissutissat aalajangiinermi annertuumik pingaaruteqartillugit isiginiarneqarsimasut pillugit nassuiaammik naatsumik imaqassaaq.

Kiisalu tunngavilersuut inatsimmi malittarisassanut aalajangiinermi tunngavigineqartunut innersuussummik erseqqissumik imaqassaaq. Tassa imaappoq aalajangiineq paragraffimut, immikkoortumut, normoqarsimappalluunniit normumut imaluunniit litraqarsimappat litramut innersuussutitaqassasoq.

Erseqqissumik tunngavilersuisoqartarnissaanik piunasaqaatip isummerfiginissaanut siusinnerusukkut periarfissaqartarsimavunga. Suliat 2021-4, 2020-5, 2019-1 aamma 2018-2 nittartakkanni www.ombudsmandi.gl-imi atuarneqarsinnaasut tamatumunnga atatillugu innersuussutigaakka.

Niels Fengerip allallu atuakkiaanni "Forvaltningsret"-imi (2018-imeersumi) qupperneq 638 innersuussutigaara.

4. Kommuniip isumaa

Aningaasat B-mut taassuma soraarneranut atatillugu tunniunneqartut pillugit allagaatinik paasitinneqarnissani A-p 28. juli 2021-mi qinnutigaa.

Allagaatinik paasitinneqarumalluni qinnutigisaq kommunip 3. august 2021-mi itigartippaa. Kommuni itigartitsinermini ilaatigut imatut allappoq:

"Ilumoorpoq akissarsianut tunngasut, soorlu tunngaviusumik aningaasartat, tapit, bonusit il.il. suliani sulisunut tunngasuni allagaatinik paasissutissiinermi ilaatinneqarne-

rat, qinnutigisalli pissutsinut taakkununga tunnganngilaq. Allagaatinik paasitinneqarumalluni qinnutigisaq aamma itigartinneqartariaqarpoq, tassami pineqartoq tassaamat pissutsinut inuup namminerisaminik [inuuneranut], matumani aningaasaqarnermut tunngasut ilanngullugit eqqarsaatigalugit, tunngasoq tak. paasitinneqarsinnaati-taaneq pillugu inatsimmi § 12.” (Ombudsmandeqarfimmi nutsigaavoq)

Kommunip uannut oqaaseqaammini 3. november 2021-meersumi paasitinneqarsinnaatitaaneq pillugu inatsimmi § 2-p atorneqarnera pillugu ilaatigut makku oqaatigai:

“[...]

Kommuneqarfik Sermersuup naliliinera unaavoq aningaasat (qassiusinnaasut) [B]-mut taassuma soraarneranut atatillugu tunniunneqarsimasut pillugit allagaatinik paasitinneqarumaneq itigartissallugu kommuni pisussaaffeqartoq.

Kommunip paasinninnera unaavoq paasissutissat § 2, imm. 2 apeqquataatinngu § 2, imm. 3 inatsisikkut tunngavigalugu paasissutissiissutigineqartut nalinginnaanerusutut pissuseqartut.

[B]-lli soraarnera pillugu paasissutissat “nalinginnaanerusutut” pissuseqangillat.

Pineqartoq tassaavoq isumaqatigiissut uuttuutit arlallit isiginiarlugit isumaqatigiissutigineqarsimasoq. Tamanna ukioqqortussuseq il.il. tunngavigalugit soraarnermut atatillugu nalinginnaanerusumik ajunngitsorsisitsinerup paarlattuutut isigineqassaaq.

[...]” (Ombudsmandeqarfimmi nutsigaavoq)

Kommunip uannut oqaaseqaammini 2022-mi januarimeersumi paasitinneqarsinnaatitaaneq pillugu inatsimmi § 2-mik atuineq pillugu ilaatigut makku oqaatigai:

“[...]

Kommunip naliliinera unaavoq [B]-p pisumi pineqartumi soraarnermut atatillugu ajunngitsorsiaasa aningaasartaasa qassiunerannik paasissutissaq paasitinneqarsinnaati-

taaneq pillugu inatsimmi § 2, imm. 3-mi pineqartunut ilaanngitsoq, tassuunalu aalajangersarneqarpoq *ateq, ilinniarsimasaq, akissarsianut tunngasut aamma sulinermit atatillugu angalasarsimanerit* pillugit paasissutissat paasissutissiissutigineqarsinnaattasut.

Kommunip naliliinera unaavoq paasissutissat pineqartut nalinginnaanerusumik pissuseqartut, taamaattumillu inuit ataasiakkaat aningaasaqarnerannut tunngasut (misikkarissut/isertuussassat) pillugit paasissutissanut attuumassuteqaratik. Pisortani atorfeqartitaasup isumaqatigiissut atuuttoq il.il. tunngavigalugit qanoq akissarsiaqarnera pillugu paasissutissaq paasissutissaagunanngilaq misikkarissoq/isertuussassaq.

Kommunilli soraarneq pillugu pisumi isumaqatigiissummi soraarsitsiniarluni suliap ingerlaloreerfigisimasaanut ilaasumi ajunngitsorsiat aningaasartaasa qassiunerat pillugu paasissutissaq nalinginnaasutut pissuseqanngimmat § 2, imm. 3-mi pineqartunut ilaanngitsutut isigaa.

[...]

Qulaani oqaatigineqartunit ersertutut Kommuneqarfik Sermersuup naliliinera unaavoq pisumi soraarnermi ajunngitsorsiat soraarsitsiniarnerup ingerlaloreerfiani isumaqatigiinniutigineqarsimasut pillugit paasissutissaq paasitinneqarsinnaattasut pillugu inatsimmi pineqartunut ilaasutut isigineqarsinnaanngitsoq, paasissutissarmi taanna § 2, imm. 3-mi pineqartunut ilaatinneqanngimmat.

Kommunilli tamatumunnga peqatigitillugu naliliinera unaavoq paasissutissat paasitinneqarsinnaattasut pillugu inatsimmi pineqartunut ilaasutut isigineqarunik paasitinneqarsinnaattasut pillugu inatsimmi § 12 paasissutissiinermi paasissutissanik/allagaatinik aalajangersimasunik ilaatitsinnginnissamut tunngaviusoq aamma § 13 paasissutissanik, pisumi pineqartumi tamanna ilaatigut namminersortut soqutigisaat pingaaruteqartut mianerineqarnissaat eqqarsaatigalugit pisariaqarpat, allagaatinik paasissutissiinermi ilaatitsinnginnissamut tunngaviusoq tunngavigalugit ilaatinneqanngisinnaallutillu ilaatinneqanngitsussaasut.

[...] (Ombudsmandeqarfirmi nutsigaavoq)

Kommunip oqaaseqaataa imatut paasivara aningaasat B-mut taassuma soraarneranut atatillugu tunniunneqarsimasut pillugit paasissutissaq allagaatinik paa-

sissutissiinermi ilaatinngikkaa, aningaasat pillugit paasissutissap paasitinneqarsinnaatitaaneq pillugu inatsisip atuuffiata avataaniinnera tunngavilersuutigalugu.

Kommunip oqaaseqaataa aamma imatut paasivara kommunip paasissutissaq taanna ilaatinniangikkaa, paasitinneqarsinnaatitaaneq pillugu inatsimmi § 12, imm. 1, nr. 1 aamma § 13, imm. 1, nr. 6 innersuussutigalugit - aningaasat pillugit paasissutissaq paasitinneqarsinnaatitaaneq pillugu inatsisip atuuffiani pineqartunut ilaatinneqaraluarpalluunniit.

Kommunip uannut oqaaseqaammini 3. november 2021-meersumi makku paasitinneqarsinnaatitaaneq pillugu inatsimmi § 12, imm. 1, nr. 1-ip aamma § 13, imm. 1, nr. 6-ip atorreqarnerat pillugu oqaatigai:

"[...]

Kommunip paasinninnera unaavoq paasissutissat taakku misikkarissuusut/isertuus-sassaasut. Tamatumani oqaatigineqarpoq aningaasat qassiunerat pillugu paasissutissaq allagaatinik paasissutissiinermi paasissutissiissutigineqarpat tamatuma aningaasat tunniunneqarnerannut tunuliaqutaasoq aningaasartuutilluunniit assigiinngitsut qanoq katitigaanerat sukumiinerusumik ilisimasaqarfiginagu tusagassiuutini allaaserineqagattaarnissaa tamanillu alapernaaserneqarnissaa qularutissaassanngitsaq.

[B]-p paasissutissat tamanut annertunerusumik soqutiginaateqanngitsutut ittut kisiisa pissutigalugit taamatut tamanit alapernaaserneqarnissaa - immikkoortillugu isigigaanni - pissusissamisoorsorinanngilaq. Aamma tamakku pissutigalugit isumaqatigiissummi aalajangersarneqarpoq taanna isertuunneqassasoq.

[...]” (Ombudsmandeqarfimmi nutsigaavoq)

Kommunip uannut oqaaseqaammini 2022-mi januarimeersumi ilaatigut makku paasitinneqarsinnaatitaaneq pillugu inatsimmi § 12, imm. 1, nr. 1-ip atorreqarnera pillugu oqaatigai:

"[...]

Kommunip naliliinera unaavoq pisumi pineqartumi soraarnermi ajunngitsorsiat aningaasartaasa qassiunerat pillugu paasissutissaasoq [B]-p nammineq aningaasaqarneranut tunngasuusoq.

Soraarnermi ajunngitsorsiat pisumi soraarsitsinermik inernilerneqarsinnaasumi isumaqatigiinniutigineqartut qassiunerat pillugu paasissutissaq paasissutissaavoq nalinginnaasuunngitsoq, pissutsinut inuup pineqartup atugaanut aningaasaqarneranullu erseqqissumik atanilerneqarsinnaanngitsoq.

Isumaliutersuutit taakku aningaasat qassiunerannik paasissutissaq isertuunneqassasoq kommunip [B]-llu soraarnermi pillugu isumaqatigiisummi aalajangersakkamik ilanngussisimanerannut tunngaviupput. Oqartussaasup isertuussisoqarnissaanik kinaasutsilluunniit isertuunneqarnissaanik nalinginnaasutigut neriorsuisinnaannginnera, neriorsuisimanerlu innersuussutigalugu neriorsuinerup qanoq annertutiginnera pillugu paasitinneqarumanermik itigartitsissutiginnissinnaannginnera kommunip eqqumaffigaa. Pisumili pineqartumi isertuussinissamik neriorsuisimaneq (annertungaatsiartumik) pingaaruteqartillugu isiginiarneqartariaqarpoq.

[...]” (Ombudsmandeqarfimmi nutsigaavoq)

Kommunip paasitinneqarsinnaatitaaneq pillugu inatsimmi § 13, imm. 1, nr. 6-ip atorineqarnera pillugu makku aamma oqaatigai:

“[...]

Kommunip naliliinera unaavoq suliami pineqartumi soraarnermi ajunngitsorsiat aningaasartaasa qassiunerannik paasissutissap tamanut saqqummiunneqarnera naleqquttuunngitsoq pitsaasuunanilu. Kommuni pisumi pineqartumi [B]-p aviisitigut eqqartorneqareersimanera isiginiarlugu naliliivoq paasissutissat innuttaasuni aalassassimaarnermik [B] eqqarsaatigalugu pitsaanngitsumik pilersitsisinnaasut.

Ataqatigiinneqarnermi tassani Kalaallit Nunaanni innuttaasut ikittunnguunerat Kalaallilu Nunaanni pingaartumillu Nuummi innuttaasut amerlanersaasa [B]-p kinaaneranik ilisimasaqarnerisa ilisimasaqarnissaasaluunniit ilimagisariaqarnerat isiginiarneqartariaqarpoq.

[...]” (Ombudsmandeqarfimmi nutsigaavoq)

5. Uanga naliliinera

5.1. Paasitinneqarsinnaatitaaneq pillugu inatsimmi § 2

5.1.1. Immikkoortumi 3.1.1-imi oqaatigisakka tunngavigalugit naliliinera unaavoq soraarnermi ajunngitsorsiat paasitinneqarsinnaatitaaneq pillugu inatsimmi pineqartunut ilaatinneqartut, tak. paasitinneqarsinnaatitaaneq pillugu inatsimmi § 2, imm. 3 taannalu pillugu oqaaseqaatit.

5.1.2. Kommuni uannut oqaaseqaataanit 2022-mi januarimeersumit erserpoq kommunip paasinninnera unaasoq paasitinneqarsinnaatitaaneq pillugu inatsimmi § 2, imm. 3 taamaallaat allagaatinik "nalinginnaanerusunik" paasissutissiisutigininnermut inatsisikkut tunngavissaliisoq.

Uanga paasinninnera unaavoq kommunip "nalinginnaanerusut"-mik oqaasertaliinnermut innersuussinera matuminnga tunngavilersorneqartoq, tassalu paasitinneqarsinnaatitaaneq pillugu inatsimmi § 2, imm 3 pillugu oqaaseqaatinit ersertoq pissutsit inatsimmi pineqartunut ilaatinneqartut tassaasut "siullermik paasissutissat "nalinginnaanerusut" arlallit.""

Uanga naliliinera unaavoq aalajangersakkap oqaasertaani imaluunniit aalajangersagaq taanna pillugu oqaaseqaatini manna takuneqarsinnaanngitsoq, tassalu paasissutissaq paasiumaneqartoq nalinginnaanerusutut pissuseqarnersoq oqartussaasoq pisumi naliliissasoq. Inatsit pillugu oqaaseqaatini paasissutissanut "nalinginnaanerusunut" innersuussineq pissutsinut aalajangersakkami pineqartunut ilaatinneqartunut, soorlu atorfeqartup aqqa, atorfia, ilinniagaqarnera il.il. pillugit paasissutissanut pingaarnertut taaguutitut taamaallaat isigaara.

Tamanna tunngavigalugu uanga paasinninnera taamaalilluni unaavoq kommuni allagaatinik paasitinneqarumanermi atorfeqartup aqqa, atorfia, ilinniarsimanera, suliaasai, akissarsiaanut tunngasut sulinermullu atatillugu angalasarneri pillugit paasissutissat pineqartunut ilaatinneqarnerisut taamalu paasitinneqarsinnaatitaaneq

neq pillugu inatsimmi § 2, imm. 3-mi pineqartunut ilaatinneqarnersut naliliinisaminut taamaallaat pisussaaffeqartoq.

Soraarnermi ajunngitsorsiat akissarsianut tunngasunut innersuussinermi pineqartunut ilaatinneqartut paasitinneqarsinnaatitaaneq pillugu inatsit pillugu oqaaseqaatini oqaatigineqarmat uanga paasinninnera unaavoq kommunip aningaasat B-mut taassuma soraarneranut atatillugu tunniunneqartut qassiunerat pillugu paasissutissaq paasitinneqarsinnaatitaaneq pillugu inatsimmi § 2, imm. 3, tak. § 2, imm. 2, tunngavigalugu ilaatinngitsoorsinnaanngikkaa.

5.1.3. Kommunip uannut oqaaseqaammini 3. november 2021-meersumi soraarnermut isumaqatigiissut "isumaqatigiissut uuttuutit arlallit isiginiarlugit isumaqatigiissutigineqarsimasoq"-mik, imaanngitsoq ukioqqortussuseq tunngavigalugu, oqarnerata uanga paasinninnera allanngortinngilaa. Kommunip uannut oqaaseqaammini 2022-mi januarimeersumi soraarnermi isumaqatigiissummi isumaqatigiinniutigineqartumi soraarnermi ajunngitsorsiat pisumi "soraarsitsiniarnermik suliap ingerlaloreerfiani" ilaanerannik oqarnerata uanga paasinninnera taamatut-taaq allanngortinngilaa.

5.1.4. Soraarnermi ajunngitsorsiat paasitinneqarsinnaatitaaneq pillugu inatsisip atuuffiani pineqartunut ilaatinneqartut uanga paasinninnerigakku paasissutissap allagaatinik paasissutissiinermi ilaatinneqanngitsoorsinnaanera pillugu apeqqut paasitinneqarsinnaatitaaneq pillugu inatsimmi malittarisassat allat tunngavigalugit aalajangerneqartariaqarpoq.

5.2. Paasitinneqarsinnaatitaaneq pillugu inatsimmi § 12, imm. 1, nr. 1

5.2.1. Immikkoortumi 3.1.2-mi allaaserineqartutut paasissutissaq allagaatinik paasissutissiinermi ilaatinneqanngitsoorsinnaavoq, pissutsinut inuup pineqartup atugaanut, matumani aningaasaqarnermut tunngasut ilanngullugit eqqarsaatigalugit, tunngasuuguni, tak. paasitinneqarsinnaatitaaneq pillugu § 12, imm. 1. nr.1. Aalajangersagaq taanna pillugu oqaaseqaatinit erserpoq allagaatinik paasitinneqarumalluni qinnutigisaq itigartinneqassappat tassani paasissutissaq pineqartoq pissutsini pissutigalugu misikkarissutut/isertuussassatut taaneqarsinnaanersoq

taamaattumillu inuiaqatigiinni nalinginnaasumik paasinninneq tunngavigalugu ilaatinneqanngissinnaasariaqarnerseq apeqqutaasoq.

Kommunip uannut oqaaseqaammini tamani oqaatigaa kommunip naliliinera unaasoq soraarnermi ajunngitsorsiat pillugit paasissutissaq paasissutissaasoq misikkarissoq/isertuussassaq. Kommunip oqaaseqaammi 2022-mi januarimeersumi aamma oqaatigaa soraarnermi ajunngitsorsiat pillugit paasissutissaq B-p nammineq aningaasaqarneranut tunngasuusoq.

5.2.2. Uanga paasinninnera unaavoq soraarnermi ajunngitsorsiat ilisimaneqarnerat pissutsit B-mut tunngasut, matumani aningaasaqarnermut tunngasut ilanngullugit eqqarsaatigalugit, pillugit ilisimasaqarnerunngitsoq, taamaattumillu taakku pillugit paasissutissiineq B-p nammineq aningaasaqarnera pillugu qulaa-jaasuunavianngitsoq.

Kommunip oqaaseqaammi 2022-mi januarimeersumi oqaatigaa pisortani atorfeqartitaasup isumaqatigiissut atuuttoq tunngavigalugu akissarsiai pillugit paasissutissaq paasissutissaanngitsoq misikkarissoq/isertuussassaq. Taamatut oqar-neq isumaqatigaara.

Uanga naliliinera unaavoq soraarnermi ajunngitsorsiat aningaasartaat pillugit paasissutissaq, akissarsiat pillugit paasissutissap isigineqarnerata pissuseqataa-nik, paasissutissatut misikkarissutut/isertuussassatut isigineqarsinnaanngitsoq.

Taamaalilluni uanga naliliinera unaavoq soraarnermi ajunngitsorsiat pillugit paasissutissaq paasissutissiinermi paasitinneqarsinnaatitaaneq pillugu inatsimmi § 12, imm. 1, nr. 1 innersuussutigalugu ilaatinneqanngitsoorsinnaanngitsoq.

5.2.3. Kommunip oqaaseqaammi 3. november 2021-meersuni oqaatigaa B-p soraarnermi ajunngitsorsiai pillugit paasissutissamik A paasissutissinneqarpat tamanna aningaasanut tunuliaqutaasoq aningaasartuutilluunniit assigiinngitsut katitigaanerat ilisimaneqanngitsoq tusagassiuutini allaaserisaqaqattaarnermut innuttaasullu alapernaasernerannut pissutissaqalersitsissasoq. Tamanna imatut

paasivara kommunip paasinninnera unaasoq B-p tamanit pitsaanngitsumik oqaluuserineqalernera tassunga pitsaasuunngitsoq.

Immikkoortumi 3.1.2-mi oqaatigineqartutut paasissutissanik paasitinneqarsinnaatitaaneq pillugu inatsimmi § 12, imm. 1, nr. 1 innersuussutigalugu isertuussisoqassappat soqutigisanik pisumi oqimaalutaasoqarnissaa piumasaqaataanngitsoq, allagaatinillu paasissutissiineq inuup paasissutissani pineqartup ajoquserneqarsinnaanera ulorianaateqarneris apeqqutaatinnagu atuuttoq.

Uanga paasinninnera unaavoq isiginiagassanik kommunip paasitinneqarsinnaatitaaneq pillugu inatsimmi § 12, imm. 1, nr. 1-imik naliliineranut atatillugu oqimaalutaanera pingaaruteqartutut isiginiarneqarsinnaanngitsoq.

5.2.4. Kommunip oqaaseqaammi 2022-mi januarimeersumi oqaatigaa kommunip naliliinera unaasoq isertuussinissamik aalajangersagaq soraarnek pillugu isumaqatigiissummi ilanngunneqarsimasoq annertungaatsiartumik pingaaruteqartilugu isiginiarneqartariaqartoq.

Immikkoortumi 3.1.2-mi allaaserineqartutut paasitinneqarsinnaatitaaneq pillugu inatsimmi malittarisassat pinngitsooratiq malinneqartussaapput, tassa imaappoq isumaqatigiissuteqarnikkut saneqqunneqarsinnaanngillat.

Taamaattumik pisumi pineqartumi isertuussinissamik neriorsuutip pingaaruteqartutut isigisariaqarneranik kommunip paasinninnera isumaqatiginngilara. Taamaalluni uanga paasinninnera unaavoq soraarnek pillugu isumaqatigiissummi isertuussinissamik aalajangersakkap soraarnermi ajunngitsorsiat pillugit paasissutissap allagaatinik paasissutissiineri ilaatinneqanngissinnaanera nassatarinngikkaa.

5.3. Paasitinneqarsinnaatitaaneq pillugu inatsimmi § 13, imm. 1, nr. 6

5.3.1. Allagaatinik paasitinneqarumanermik qinnutigisaq pisumi naliliineq tunngavigalugu paasitinneqarsinnaatitaaneq pillugu inatsimmi § 13, imm. 1, nr. 6 tunngavigalugu killilerneqarsinnaavoq, tamanna namminersortut pisortallu an-

nertuumik soqutigisaasa illersorneqarnissaat pisariaqarpat, tassanilu pissutsip immikkut ittuunera pissutigalugu isertuussineq pisariaqarpat. Aalajangersakkap oqaasertaani erseqqissumik oqaatigineqarpoq isertuussineq pissutsip *immikkut* ittuunera pissutigalugu pisariaqartuussasoq.

Uanga paasinninnera unaavoq namminersortup soqutigisaa annertoq kommunip allagaatinik paasitinneqarumalluni qinnutigisamik itigartitsinermini tunngavilersuutaa tassaasoq B-p nammineq inuuneqarnera.

5.3.2. Soraarnermi ajunngitsorsiat pillugit paasissutissap misikkarissuunera/i-sertuussassaanera kommunip oqaaseqaammini 3. november 2021-meersumi innersuussutigaa. Kommunip isiginiagassat paasitinneqarsinnaatitaaneq pillugu inatsimmi § 12, imm. 1, nr. 1-ikkut illersugaareersut taamaalilluni tunngaviutiniarpai.

Pissutsit inuit ataasiakkaat atugaannut, matumani aningaasaqarnerannut tunngasut ilanngullugit eqqarsaatigalugit, tunngasut illersugaasut § 12, imm. 1, nr. 1-imi taagorneqareersimammata uanga naliliinera unaavoq pissuseq taanna ima *immikkut* itsiginngitsoq, paasissutissap paasitinneqarsinnaatitaaneq pillugu inatsimmi § 13, imm. 1, nr. 6 innersuussutigalugu ilaatinneqannginnissaanut periarfissaqarnani.

5.3.3. Kommunip oqaaseqaammi 2022-mi januarimeersumi aamma oqaatigaa A-p soraarnermi ajunngitsorsiat pillugit paasissutissinneqarnera "naleqquttuunngitsoq pitsaasuunanilu", "paasissutissa[mmi] innuttaasuni aalassassimaarnermik [B] eqqarsaatigalugu pitsaanngitsumik pilersitsisinnaa[mmata]."

Kommunip ataqatigiinneqarnermi tassani oqaatigaa B aviisitigut eqqartorneqareersimasoq, Kalaallilu Nunaanni pissutsit immikkut ittut isiginiarneqassasut, kommunimmi ilimagimmagu amerlanerpaat B kinaasoq nalunngikkaat ilisimasaqarfigaluguluunnit.

B-p Kalaallit Nunaanni innuttaasorpassuarnit naluneqannginnera allagaatinik paasitinneqarumanermik itigartitsinermut tunngavilersuutitut suliamut attuu-

massuteqanngitsutut isigaara. Kialuunniit kommunimi pisortaanerusutut atorfeqartitaasup atorfeqartitaasimasulluunniit tusagassiuutitigut – pitsaasumik pitsaanngitsumillu – eqqartorneqarnissani naatsorsuutigisariaqarpaa – pingaartumik soraarnerminut atatillugu.

Tamatumunnga uiggiullugu paasitinneqarsinnaatitaaneq pillugu inatsimmi § 13, imm. 1, nr. 1 atorfeqassappat suli piumasaqaataavoq isertuussisoqarnissaa pineqartup pissusiata *immikkut* ittuunera pissutigalugu pisariaqartuussasoq.

Uanga naliliinera unaavoq § 2, imm. 3 pillugu oqaaseqaatini soraarnermi ajunngitsorsianut innersuussineq ima isumaqartoq akissarsiat tapillu allat pillugit paasissutissat paasissutissatut tamanut soqutiginaateqavissuunertik ilisarnaatigi-gaat.

Uanga tamanna tunngavigalugu naliliinera unaavoq soraarnermi ajunngitsorsiat pillugit paasissutissamik isertuussinissaq pisup immikkut ittuunera tunngavigalugu pisariaqartuunngitsoq. Taamaalilluni aningaasat B-mut taassuma soraarnera-nut atatillugu tunniunneqartut amerlassusiat pillugu paasissutissaq kommunip allagaatinik paasissutissiinermi paasitinneqarsinnaatitaaneq pillugu inatsimmi § 13, imm., nr. 6 innersuussutigalugu ilaatinngitsoorsinnaanngilaa.

5.4. Tunngavilersuut pillugu piumasaqaatit

5.4.1. Imm. 3.2-mi oqaatigineqartutut aalajangersagaq eqqortumik sukumiisu-millu tunngavilersugaassaaq. Aalajangiinermi paragraffimut, immikkoortumut, litraqarsimappat litramut normoqarpallu normunut innersuussisoqassaaq.

Kommuni aalajangiinermi 3. august 2021-meersumi taamaallaat paasitinneqar-sinnaatitaaneq pillugu inatsimmi § 12-imut innersuussivoq. Uanga naliliinera unaavoq inatsisikkut tunngavigisamut innersuussut taanna naammanngitsoq/a-migartoq.

5.4.2. Immikkoortumi 3.1.2-mi oqaatigineqartutut paasitinneqarsinnaatitaaneq pillugu inatsimmi § 12, imm. 1, nr. 1 atorfeqassappat pisumi soqutigisanik oqi-

maalutaasoqarnissaa piumasaqaataangilaq, taamaallaalli allagaatinik paasitinneqarumanermi allagaatit pissutsinut inuit ataasiakkaat, matumani aningaasaqarnerannut tunngasut ilanngullugit eqqarsaatigalugit, atugaannut tunngasunik ilaatinneqarnerisut apeqqutaalluni. Kommuni tamatumunnga atatillugu naliliissaaq paasissutissaaq misikkarissutut/isertuussassatut taaneqarsinnaanersoq imatullu pissuseqarnerisooq inuiaqatigiinni nalinginnaasumik paasinnittaaseq malillugu tamanit ilisimalerneqarnissaanut isertuunneqassasoq piumasaqaatigisariaqarluni.

Aalajangiineq 3. august 2021-meersoq soraarnermi ajunngitsorsiat pillugit paasissutissaaq B-p nammineq inuuneqarnera, matumani aningaasaqarneranut tunngasut ilanngullugit eqqarsaatigalugit, pillugu paasissutissaaq paasissutissatut misikkarissutut/isertuussassatut sooq isigineqassasoq nassuiaammik ilaqartinneqanngilaq. Isumaliutersuutit allat naliliinermi ilanngunneqarsimanersut kommunip taamatuttaaq allaaserisimanngilaa.

Kommunip aalajangiinera amigaaatilittut tunngavilersuullu suliaassat suliarineqartarnerat pillugu inatsimmi aalajangiineq pillugu piumasaqaatinik immikkoortumi 3.2-mi allaaserineqartunik eqqortitsisuunngitsutut isigaara.

5.4.3. Kommunip itigartitsinera 3. august 2021-meersoq aallaavigalugu uanga paasinninnera unaavoq A-p allagaatinik paasitinneqarumalluni qinnutigisaa kommunip akissarsianut, soorlu tunngaviummik akissarsianut, tapisianut bonusinut il.il., tunngasunut pineqartunut ilaangitsutut isigigaa.

Uanga tamanna tunngavigalugu paasinninnera unaavoq kommunip naliliinera unaasoq soraarnermi ajunngitsorsiat pillugit paasissutissaaq paasitinneqarsinnaattaneq pillugu inatsimmi § 2, imm. 3-mi pineqartunut ilaatinneqanngitsooq.

Kommunilli allagaatinik paasitinneqarumanermik itigartitsinerani 3. august 2021-meersumi § 2, imm. 3-mut imaluunniit aalajangersagaq taanna tunngavigalugu pisumi naliliinermut innersuussummik takusassaqanngilaq.

Tamanna tunngavigalugu tunngavilersuut aalajangiinermi oqaatigineqartoq kommunip isumaliutersuutigisimasarpiaanik takutitsisuunngitsutut isigaara.

Taamaattumik uanga naliliinera unaavoq kommunip tunngavilersuutaa amigaateqartoq, tassami isumaliutersuutit aalajangersakkalluunniit sorlerpiaat kommunip ilanngussimanerai tunngavilersuummi takuneqarsinnaanngimmat.

5.4.4. Qulaani oqaatigineqartutut uanga paasinninnera unaavoq kommunip naliliinera unaasoq soraarnermi ajunngitsorsiat pillugit paasissutissaq paasitinneqarsinnaatitaaneq pillugu inatsisip atuuffiani ilaatinneqanngitsoq, tak. paasitinneqarsinnaatitaaneq pillugu inatsimmi § 2, imm. 2 aamma 3.

Kommunilli uannut oqaaseqaammini oqaatigaa soraarnermi ajunngitsorsiat pillugit paasissutissaq paasitinneqarsinnaatitaaneq pillugu inatsimmi § 2, imm. 3 innersuussutigalugu pineqartunut ilaatinneqarsinnaanngikkuni tassunga taarsiullugu paasitinneqarsinnaatitaaneq pillugu inatsimmi § 12, imm. 1 nr. 1 aamma § 13, imm. 1, nr. 6 tunngavigalugit ilaatinneqanngissinnaasoq.

Oqaatigaara eqqortumik aalajangiisoqartarnissaanik piunasaqaat imatut isumaqartoq kommunip aalajangiinermi taarsiullugit tunngavilersuutitut periarfissat al-lat oqaatigisinnaanngikkai, soraarnermimi ajunngitsorsiat pillugit paasissutissaq paasitinneqarsinnaatitaaneq pillugu inatsimmi pineqartunut ilaatinneqarmat ilaatinneqaraniluunniit.

6. Eqikkaalluni inerniliineq

Isumaqarpunga aningaasat B-mut taassuma soraarneranut atatillugu ajunngitsorsiatut tunniunneqartut pillugit paasissutissaq paasitinneqarsinnaatitaaneq pillugu inatsimmi § 2, imm. 3-mi pineqartunut ilaatinneqartoq.

Isumaqarpungattaq soraarnermi ajunngitsorsiat pillugit paasissutissaq inuup nammineq inuuneqarneranut, matumani aningaasaqarneranut tunngasut ilanngullugit eqqarsaatigalugit, tunngasut pillugit paasissutissatut misikkarissutut/i-sertuussassatut pissuseqanngitsoq, soraarnermilu ajunngitsorsiat pillugit paasis-

sutissap isertuunneqarnissaa pissutsip immikkut ittuunera pissutigalugu pisariaqanngitsoq. Taamaalilluni uanga naliliinera unaavoq kommunip soraarnermi ajunngitsorsiat pillugit paasissutissaq paasitinneqarsinnaatitaaneq pillugu inatsimmi § 12, imm. 1, nr. 1 imaluunniit § 13, imm. 1, nr. 6 innersuussutigalugit ilaatingissinnaanngikkaa.

Uanga paasinninnera unaavoq kommunip aalajangiinera 3. august 2021-meersoq amigaateqartoq, kommunimmi aalajangersagaq aalajangiinermini tunngavigisimasani erseqqissumik innersuussutiginnimmagu.

Uanga paasinninnera aamma unaavoq kommunip aalajangiinera 3. august 2021-meersoq amigaateqartoq, kommunimmi soraarnermi ajunngitsorsiat pillugit paasissutissaq paasissutissatut misikkarissutut/isertuussassatut sooq isiginerlugu nassuiarsimanngimmagu.

Kiisalu uanga paasinninnera unaavoq kommunip aalajangiinera 3. august 2021-meersoq amigaateqartoq, aalajangiingermi kommunip isumaliutersuutigisimasarpiaanik takutitsisuunngimmat, tassami kommunip uannut oqaaseqaatimini pissutsit aalajangiinermi eqqaaneqarsimanngitsut oqaatigisimammagit.

Ataatsimut isiginnillunga isumaqarpunga kommunip aalajangiinermit 3. august 2021-meersumut tunngavilersuutaa isorisariaqartuusoq.

Kommuni tamanna tunngavigalugu qinnuigaara suliaq oqaaseqaatikka isiginiarlugit suliareqqeqqullugu.

Kommuni qinnuigaara tamanna kommunip qanoq iliuuseqarnissaanut pissutissaqalersitsinersoq uannut nalunaarutigeqqullugu.

Oqaaseqaat manna oqaaseqaammi pineqartut kikkuussusii ilisarnarunnaarsillugit nittartakkakkut tamanut saqqummiunneqassaaq 2022-milu ukiumoortumik nalunaarutinni eqqaaneqassalluni.

Suliap ingerlasimanerata allaaserineqarnera

A-p allagaatinik paasitinneqarnissami kommunimut 28. juli 2021-mi qinnutigaa. Allagaatinik paasitinneqarumalluni qinnutigisami tassani makku oqaatigineqarput:

“Aningaasat [B]-mut taassuma Kommuneqarfik Sermersuumi atorfirmimit soraarnernut atatillugu tunniunneqartut pillugit allagaatinik paasitinneqarumallunga qinnuteqarpunga. [Lektor]-ip immikkut ilisimasallip Danmarks Medie- og Journalisthøjskole-milu ingerlatsiner-mi pisortaasoq oqarpoq allagaatinik taamatut paasitinneqasinnaatitaasunga. [Lektor]-ip oqaatigaa taamaalillutik suliani soraarnernut tunngasuni aningaasat pillugit paasissutissat paasissutissiiner-mi pineqartunut ilaatinneqartut.” (Ombudsmandeqarfimmi nutsigaavoq)

A-p allagaatink paasitinneqarumalluni qinnutigisaa kommunip 3. august 2021-mi itigartippaa, makku oqaatigalugit:

“Ilumoorpoq akissarsianut tunngasut, soorlu tunngaviumik aningaasartat, tapit, bonusit il.il. suliani sulisunut tunngasuni allagaatinik paasissutissiiner-mi ilaatinneqannginnginnerat, qinnutigisalli pissutsinut taakkununga tunnganngilaq. Allagaatinik paasitinneqarumalluni qinnutigisaa aamma itigartinneqartariaqarpoq, tassami pineqartoq tassaammat pissutsinut inuup namminerisaminik [inuuneranut], matumani aningaasaqarnermut tunngasut ilanngullugit eqqarsaatigalugit, tunngasoq tak. paasitinneqarsinnaatitaaneq pillugu inatsimmi § 12.” (Ombudsmandeqarfimmi nutsigaa-voq)

Allagaatinik paasitinneqarumalluni qinnutigisami 28. juli 2021-meersup kommunimit itigartinneqarnera A-p uannut 18. august 2021-mi naammagittaalliutigaa.

Kommuni 1. september 2021-mi qinnuigaara suliami allagaatit tamasa suliarlu pillugu oqaaseqaat uannut nassiuteqqullugit. Makku ilaatigut oqaatigaakka:

“[...]

1. Kommuneqarfik Sermersuup (matuma kingornatigut kommunimik taaneqartartusap) allagaatinik paasitinneqarumanerup itigartinneqarnissaanik aalajangiinera 3. august 2021-meersoq [A]-p uannut e-mailikkut 18. august 2021-meersuk-kut ilanngus-sartalikkut naammagittaalliutigaa.

Kommuni qinnuigaara suliami [A]-p suliami allagaatinik paasitinneqarumaneranut tunngasumi allagaatit tamaasa kiisalu suliaq pillugu oqaaseqaat uannut nassiuteqqul-lugit.

[A]-p kommunimut e-mailianit 28. juli 2021-meersumit erserpoq aningaasat B-mut taassuma kommunimit atorfimminit sorarneranut atatillugu tunniunneqarsimasut pil-lugit allagaatinik paasitinneqarnissani kissaatigigaa.

Kommuniap aalajangiinera 3. august 2021-meersoq imatut paasineqassanersoq paa-siuminaatsippara, tassalu kommuni naliliisimasoq paasissutissat [A]-p paasiumallugit kissaatigisai paasitinneqarsinnaatitaaneq pillugu inatsimmi § 2, imm. 2 tunngavigalu-gu paasitinneqarsinnaatitaaneq pillugu inatsimmi pineqartunut ilaatinneqanngitsut. I-maluunniit kommuni naliliisimasoq paasissutissat [A]-p paasiumallugit kissaatigisai paasitinneqarsinnaatitaaneq pillugu inatsimmi pineqartunut ilaatinneqartut, paasissu-tissiinermili ilaatinneqassanngitsut, tak. paasitinneqarsinnaatitaaneq pillugu inatsimmi § 12, imm. 1.

2. Pisortat ingerlatsinerat pillugu paasitinneqarsinnaatitaaneq pillugu Inatsisartut inat-sisaanni (paasitinneqarsinnaatitaaneq pillugu inatsimmi) nr. 9-mi, 13. juni 1994-i-meersumi kingusinnerusukkut allannguuteqartinneqartumi § 2, imm. 2-kkut aamma 3-kkut makku aalajangersarneqarput:

“Imm. 2. Aammattaaq sulianut pisortani sulisunik atorfinitsitsinernut imaluunniit pisortani atorfinnut qaffasinnerusunut qaffatsinneqarnernut tunngasunut inatsit a-tuutinngilaq, § 6-imi aalajangersagaq eqqaassanngikkaanni. Tamanna paasissutis-sanut inuit ataasiakkaat pisortani atorfeqarnerannut tunngassuteqartunut aamma atuuppoq, taamaattorli imm. 3 aamma § 4, imm. 2 takuuk.

Imm. 3. Suliani imm. 2-mi oqaaseqatigiit aappaanni taaneqartuni atorfeqartup aq-qa, atorfia, ilinniagaqarnera, suliassai, akissarsiai suliamullu atatillugu angalaneri pillugit paasissutissanut inatsit atuuppoq. Aammattaaq pisortatut atorfinni atorfi-nitsinneqartut eqqarsaatigalugit inatsit suliamut atatillugu mianersoqqussutit iliuu-serisallu taakkunannga sakkortunerusut pillugit paasissutissanut atuuppoq. Taa-maattorli tamakku pillugit inaarutaasumik aalajangiinermi ukiuni marlunni taa-maallaat tamanna atuuppoq.”

Paasitinneqarsinnaatitaaneq pillugu inatsimmi § 2, imm. 3 pillugu oqaaseqaatinit ilaa-tigut makku erserput:

“1. Aalajangersakkap taassuma sulisorisat pillugit paasissutissani aalajangersima-suni paasissutissat ilaasa imm. 2-mi oqaaseqatigiit aappaanni taaneqarsimasut

paasitinneqarsinnaatitaaneq pillugu inatsimmi pineqartunut ilaatinneqarnerat nasataraa.

[...]

Aammattaaq paasissutissat akissarsianut tunngasut inatsimmi pineqartunut ilaatinneqarput. Tamanna tunngaviusumik akissarsiaannarnut il.il. atuutinngilaq, aammali qaangiuttoornersianut, pikkorissarnermut immikkullu suliaqarnermut tapisianut, tapisianut immikkut ittunut, soraarnermut atatillugu ajunngitsorsianut soraarnerussutisianullu il.il. atuulluni. [...] Kisianni assersuutigalugu tapisianik tunineqarneq imaluunniit soraarnermut atatillugu ajunngitsorsiassat pillugit isumaqatigiissteqarnermi tunngaviusut erseqqinnerusut pineqartunut ilaatinneqanngillat.

[...]”

Paasitinneqarsinnaatitaaneq pillugu inatsimmi § 12-ikkut aalajangersarneqarpoq paasissutissat aalajangersimasut allagaatinik paasissutissiinermi ilaatinneqassanngitsut. § 12 imaattunik oqaasertaqarpoq:

”§ 12. Paasitinneqarsinnaatitaanermi paasissutissat makku ilaatinneqanngillat:

- 1) inuit ataasiakkaat inuuneri pillugit paasissutissat, matumani aningaasaqarneranut tunngasut ilanngullugit,
- 2) teknikkikkut atortulersuutit imaluunniit periutsit imaluunniit ingerlatsinikkut niuernikkulluunniit pissutsit assigisaalluunniit, inummut suliffeqarfimmulluunniit aningaasaqarnikkut annertuumik pingaarutillit pissutigalugit saqqummiunneqarnissaat akuersissutigineqarsinnaanngitsut.

Imm. 2. Allakkiap ilaanna imm. 1-imi aalajangersakkamut ilaatinneqarpat allakkiap imarisaata sinnera pillugu pineqartoq paasitinneqassaaq.”

Paasitinneqarsinnaatitaaneq pillugu inatsimmi § 12, imm. 1, nr. 1 pillugu oqaaseqaatinit ilaatigut makku erserput:

”[...]

Allannguummi tassani siunertarineqarpoq killiliinermi aalajangersarneqassasoq ilaatitsinnginnissami paasissutissat suut ilaatinneqarsinnaanersut, pingaartumik paasissutissat ”mianernartuutillugit”, tassa inuiaqatigiinni paasinnittarneq nalinginnaasoq tunngavigalugu tamanit ilisimaneqalernissaasa pinngitsoortinneqarnissaat piumasarineqartariaqarluni. Oqaasertaanik allannguinnikkut ilaatitsinnginnissamut aalajangersakkap atuuffigisimasai annikilliallatsinneqarput.

[...]”

§ 12, imm. 1, nr. 1-imi aalajangersagaq pissutsit inuit ataasiakkaat aningaasaqarnerinut tunngasut eqqarsaatigalugit atorneqartarpoq. Piumasaqaataavorli paasissutissat pineqartup nammineq nalinginnaasumik aningaasaqarneranut tunngasuussasut tamatuminnigaluunniit paasissutissiisuussasut. John Vogterip atuakkiaani “Offentlighedsloven med kommentarer”-mi, pingajussaanik naqitertinneqartumi (1998-imeersumi), qupperneq 221 innersuussutigaara.

Atorfeqartitaasut pisortaniluunniit suliassaqaartitaasut ataasiakkaat pillugit paasissutissat arlallit inummut namminermut tunngalluinnartutut paasineqarsinnaanngillat, pineqartummi tassaammata pissutsit sulinermut tunngasut pillugit paasissutissat. Karsten Revsbachip allallu atuakkiaanni “Forvaltningsret, Sagsbehandling”-imi, arfineq pingajussaanik naqitertinneqartumi (2019-imeersumi), qupperneq 268 innersuussutigaara.

Kalaallit Nunaanni inatsiseqartitsinermit tunngaviup Danmarkimi inatsiseqartitsinermit siusinnerusukkut massakkullu tunngavik pingaarnerusutigut assigimmagu Danmarkimi suliassaqaarfimmi tassani atuakkiaasimasut innersuussutigaakka.

3. Kommuni qinnuigaara A-p allagaatinik paasitinneqarumalluni qinnutigisaa paasitinneqarsinnaatitaaneq pillugu inatsimmi § 2, imm. 2 imaluunniit § 12, imm. 1, nr. 1 innersuussutigalugu kommunip itigartissimanera oqaaseqaammimi immikkut paasissutissiissutigeqqullugu.

Itigartitsinerup § 2, imm. 2 imaluunniit § 12, imm. 1, nr. 1 innersuussutigalugu pisimanagera apeqqutaatinnagu kommuni qinnuigaara allagaatinik paasitinneqarumanermik qinnutigisap itigartinneqarnissaanik aalajangiineq pillugu nassuiaateqaqqullugu. Kommuni aammattaaq qinnuigaara annertusisamik paasissutissiisarnermik tunngavik mallillugu allagaatinik paasissutissiisoqarsinnaanersoq kommuni naliliisimanersoq paasissutissiissutigeqqullugu.

[...]”

Kommuni allakkani 1. september 2021-meersuni qinnuigaara suliami allagaatit kommunillu oqaaseqaataa uannut kingusinnerpaamik 1. oktober 2021-mi tiguneqarsimasussanngorlugit nassiuteqqullugit.

Nukingisaarutitut allakkat kommunimut 14. oktober 2021-mi nassiuppakka, allakkallu kommunimut 1. september 2021-mi nassiussimasakka eqqaasitsissutigalugit.

Piffissaliussap 1. november 2021-mut kinguartinneqarnissaanik kommunip qinnutigisaa 20. oktober 2021-mi tiguara.

Kommunip oqaaseqaataa 3. november 2021-mi tiguara, tassanilu ilaatigut makku oqaatigineqarput:

"[...]

Aallaqqaasiut

Ilumoorpoq allagaatinik paasitinneqarumanermik qinnutigisap itigartineqarnera paasissutissat paasitinneqarsinnaatitaaneq pillugu inatsimmi pineqartunut ilaannginnerat imaluunniit paasissutissat pissutsinut inuup atugaanut tunngasuunerat eqqarsaatigalugu ilaatinneqannginnerat innersuussutigalugu pisimanersoq nalornissutigineqalaarsinnaammat, tak. tulleriinneri malillugit § 2, imm. 2 aamma § 12, imm. 1, nr. 1.

Tamanna pissutsinik arlalinnik pissuteqarpoq, matumani allagaatinik paasitinneqarumalluni qinnutigisap aallaqqaasiutitut soraarnek pillugu isumaqatigiissummut tunngasooriarluni kingusinnerusuklut aningaasanut killilerneqarsimanera ilanngullugu eqqarsaatigalugu. Tassani aamma ilaavoq naak qinnutigisap aasaanerani sulinngiffeqarnerup nalaani tunniunneqaraluartoq uanga pilertortumik akissuteqarnissaanik pingaartitsinera. Taamaattumik naatsumik eqqortumillu akissuteqarnissaq qitiutinneqarsimavoq.

Itigartitsinermut inatsiseqartitsinikkut tunngavigisaq

Kommuneqarfik Sermersuup naliliinera unaavoq aningaasat (qassiusinnaasut) [B]-mut taassuma soraarneranut atatillgu tunniunneqarsimasut pillugit allagaatinik paasitinneqarumanek itigartissallugu kommuni pisussaaffeqartoq.

Kommunip paasinninnera unaavoq paasissutissat § 2, imm. 2 apeqqutaatinnagu § 2, imm. 3 inatsisikkut tunngavigalugu paasissutissiissutigineqartut nalinginnaanerusutut pissuseqartut.

[B]-lli soraarnera pillugu paasissutissat "nalinginnaanerusutut" pissuseqangillat.

Pineqartoq tassaavoq isumaqatigiissut uuttuutit arlallit isiginiarlugit isumaqatigiissutigineqarsimasoq. Tamanna ukioqqortussuseq il.il. tunngavigalugit soraarnermut atatillugu nalinginnaanerusumik ajunngitsorsisitsinerup paarlattuutut isigineqassaaq.

Kommunili allagaatinik paasitinneqarumanermik paasitinneqarsinnaatitaaneq pillugu inatsimmi § 12, imm. 1, nr. 1-imi aamma § 13, imm. 1, nr. 6-imi malittarisassat tunngavigalugit itigartitsinnissaminut pisussaaffeqartutut imminut isigivoq.

Paasitinneqarsinnaatitaaneq pillugu inatsimmi § 12, imm. 1, nr. 1 aamma § 13, imm. 6

Paasitinneqarsinnaatitaaneq pillugu inatsimmi § 12, imm. 1, nr. 1-ikkut naluneqanngitsutut aalajangersarneqarpoq allagaatinik paasitinneqarsinnaatitaanermi pissut-sinut ataasiakkaat inuunerannut, matumani aningaasaqarnermut tunngasut ilanngullugit eqqarsaatigalugit, tunngasut pineqartunut ilaatinneqanngitsut. § 13, imm. 1, nr. 6-ikkut aalajangersarneqarpoq allagaatinik paasissutissiineq klillilerneqassasoq, tamanna ilaatigut inuit ataasiakkaat soqutigisaat pingaaruteqartut illersorniarlugit pissutsit immikkut issusia pissutigalugu isertuussinissaq pisariaqarpat.

Paasitinneqarsinnaatitaaneq pillugu Inatsisartut inatsisaata Inatsisartut inatsisaatigut nr. 1-ikkut, 31. maj 1999-imeersukket § 2-mik allanngortitsiviusup Danmarkimi paasitinneqarsinnaatitaaneq pillugu inatsit 1985-imeersoq 1993-imi 1998-imilu allannguuteqartinneqartoq pingaarnerusutigut assigaa.

John Vogterip atuakkiamini "Offentlighedsloven med kommentarer"-mi 1998-imeersumi quppernermi 96-imi inatsit taanna pillugu oqaaseqaatimini ilaatigut makku oqaatigai:

"Paasitinneqarsinnaatitaanerli pillugu inatsimmi § 12-imi aamma § 13-imi aalajangersakkat atorfeqartitaasoq pillugu paasissutissat misikkarissuusinnaasut allagaatinik paasissutissiinermi ilaatinneqartannginnissaat qulakkiissavaat, taamatuttaarlu ilimagisariaqarunarluni aalajangersakkat taakku, matumani § 13, imm. 1, nr. 6 ilanngullugu eqqarsaatigalugu, qanoq paasineqarnissaat suliat pisortani atorfeqartitaasunut tunngasut eqqarsaatigalugit nassuiarneqartarumaartoq."

Oqaatigineqarpoq Kalaallit Nunaanni paasitinneqarsinnaatitaaneq pillugu inatsimmi § 12, imm. 1, nr. 1-ip aamma § 13, imm. 1, nr. 6-ip Danmarkimi paasitinneqarsinnaatitaaneq pillugu inatsimmi taamani atuuttumi § 12, imm.1, nr. 1 aamma § 13, imm. 1, nr. 6 assigigaat.

[B]-p soraarnermi ajunngitsorsiaasa aningaasartaasa qanoq amerlassuseqarnerat paasitinneqarsinnaatitaaneq pillugu inatsimmi pineqartunut ilaatinneqartutut isigineqarpat Kommuneqarfik Sermersooq naliivoq allagaatink paasissutissiineq klillilerneqassasoq, paasitinneqarsinnaatitaaneq pillugu inatsimmi § 12, imm. 1, nr. 1 aamma § 13, imm. 1, nr. 6 innersuussutigalugit.

Kommunip paasinninnera unaavoq paasissutissat taakku misikkarissuusut/isertuussassaasut. Tamatumani oqaatigineqarpoq aningaasat qassiunerat pillugu paasissutissaq allagaatinik paasissutissiinermi paasissutissiissutigineqarpat tamatuma aningaasat

tunniunneqarnerannut tunuliaqutaasoq aningaasartuutilluunniit assigiinngitsut qanoq katitigaanerat sukumiinerusumik ilisimasaqarfiginagu tusagassiuutini allaaserineqagattaarnissaa tamanillu alapernaaserneqarnissaa qularutissaassanngitsaq.

[B]-p paasissutissat tamanut annertunerusumik soqutiginaateqanngitsutut ittut kisiisa pissutigalugit taamatut tamanit alapernaaserneqarnissaa – immikkoortillugu isigigaanni - pissusissamisoorsorinanngilaq. Aamma tamakku pissutigalugit isumaqatigiissummi aalajangersarneqarpoq taanna isertuuneqassasoq.

Karnovip Danmarkimi paasitinneqarsinnaatitaaneq pillugu inatsimmi § 21, imm. 3 (akissarsianut il.il. tunngasut pillugit paasissutissiisarnermut tunngasoq) pillugu oqaaseqaataa 112 naggassiutitut innersuussutigaa, taannalu imaattunik imaqarpoq:

“Paasissutissat imm. 3-mi taaneqartut inatsimmi pineqartunut ilaatinneqarnerat illu’ani isumaqarpoq taakku § 2-mi ilaatitsinnginnissamik aalajangersagaq tunngavigalugu paasissutissiinermi ilaatinneqanngissinnaassanngitsut, illua’tungaani isumaqarluni paasissutissanik taakkuninnga paasissutissiinissamik apeqqut inatsimmi aalajangersakkat nalinginnaasut tunngavigalugit aalajangerneqassasoq. Taamaattumik paasissutissat taakku paasissutissiinermi soorlu § 30, imm. 1, nr. 1 malillugu tunngaviatigut ilaatinneqanngissinnaapput, tassuunilu aalajangersarneqarpoq paasissutissat pissutsinut inuit ataasiakkaat atugaannut, matumani aningaasaqarnermut tunngasut ilanngullugit eqqarsaatigalugit, tunngasut paasitinneqarsinnaatitaanermi pineqartunut ilaatinneqanngitsut.”

Annertusisamik paasissutissiisarneq

Paasissutissat paasissutissiinermi pineqartunut ilaatinneqanngitsutut kommunip isigigaluarai annertusisamik paasissutissiisarneq pillugu malittarisassat tunngavigalugit paasissutissiinissamut pissutissaqarnersoq allagaatinik paasitinneqarumalluni qinnutigisap suliarineqarnerat atatillugu isumaliutersuutigineqarsimavoq.

[B]-p nammineq aningaasaqarneranut tunngasut pineqarnerat isiginiarlugu aamma pisortat soqutigisaasa annertuut allagaatinik paasissutissiisoqannginneratigut ajoqserneqarnerat takuneqarsinnaanngikkaluartoq aalajangiisoqarpoq annertusisamik paasissutissiisarnermik aallaavik tunngavigalugu paasissutissiisoqassanngitsaq.

[...]” (Ombudsmandeqarfimmi nutsigaavoq)

Suliani allagaatit ilaat kommunimit 12. november 2021-mi tiguakka.

Kommuni 26. november 2021-mi qinnuigaara ilassutaasumik oqaaseqaat aamma soraarnermi isumaqatigiissutip B-mut isumaqatigiissutigineqarsimasup assilinera uannut nassiuteqqullugit. Makku ilaatigut oqaatigaakka:

“[...]

1. Kommuni oqaaseqaat tunngavigalugu qinnuigaara kommunip [B]-p soraarnerq pillugu isumaqatigiissutigisimasaat uanut nassiuteqqullugu, isumaqatigiissutip imarisaa uanga paasinninnera malillugu pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaanni nr. 8-mi, 13. juni 1994-meersumi (matuma kingornatigut paasitinneqarsinnaatitaaneq pillugu inatsimmik taaneqartartussami) kingusinnerusukkut allannguuteqartinneqarsimasumi paasissutissiinermi ilaatitsinnginnissamik aalajangersakkani pineqartunut ilaatinneqarnersoq naliliinissannut periarfisaqarsinnaaqqullunga.

2. Kommuni aammattaaq qinnuigaara [A]-p allagaatinik paasitinneqarumalluni qinnutigisaanik 28. juni 2021-meersumik itigartitsinermut kommunip tunngavilersuutaa itisileqqullugu.

Kommunip itigartitsineq paasitinneqarsinnaatitaaneq pillugu inatsimmi § 2, imm. 2 aamma 3, § 12, imm. 1, nr. 1 imaluunniit § 13, imm. 1. nr. 6 innersuussutigalugit tunngavilersorneraa oqaaseqaammi 3. november 2021-mi tiguneqartumi erseqqissumik takuneqarsinnaanngilaq.

Kommuni qinnuigaara aalajangersagaq suna allagaatinik paasitinneqarumanermik itigartitsinermut tunngaviunersooq immikkut innersuussutigeqqullugu. Kommuni tamatumunga atatillugu soraarnerq pillugu isumaqatigiissummi pissutsit sordiaat allagaatinik paasitinneqarumanermik itigartitsinermut tunngavilersuutigineqarnerat pillugu immikkut nassuiaateqaqqullugu.

[...]”

Kommuni allakkani 26. oktober 2021-meersuni qinnuigaara soraarnermi isumaqatigiissutip assilinera kommunillu ilassutaasumik oqaaseqaataa uannut kingusinnerpaamik 26. december 2021-mi nassiuteqqullugu.

Nukingisaarut kommunimut 14. januar 2022-mi nassiuppara, allakkallu kommunimut 26. november 2021-mi nassiussakka eqqaasitsissutigalugit.

Oqaaseqaat 3. november 2021-meersoq kommunip 14. januar 2022-mi nassiu-teqqippaa.

Nukingisaarut kommunimut tamanna tunngavigalugu 17. januar 2022-mi nassuuppara, kommunilu tassani qinnuigalugu soraarnermi isumaqatigiissutip assiliner kommunillu ilassutaasumik oqaaseqaataa nassiuteqqullugit, oqaaseqaallu 3. november 2021-meersoq tigoreeersimagigiga innersuussutigalugu.

Kommuni suli ataasiarlunga 15. februar 2022-mi nukingisaaqqippara, tassanilu suliap ingerlasimanera nassuiarpara kommunilu qinnuigalugu soraarnermi isumaqatigiissutip assiliner kommunillu ilassutaasumik oqaaseqaataa nassiuteqqullugit.

Soraarnermi isumaqatigiissutip assiliner ilassutaasumillu oqaaseqaat 16. februar 2022-mi tiguakka. Kommunip oqaaseqaammi ilaatigut makku oqaatigai:

"[...]

Kommunip [B]-llu soraarnek pillugu isumaqatigiissutigisimasaannik nassius-sineq

Aallaqqaasiutitut oqaatigineqarpoq [A]-p allagaatinik paasitinneqarumalluni qinnutigisaa aningaasat [B]-mut taassuma kommunimi atorfimminit soraarneranut atatillugu tunniunneqartut pillugit paasissutissamut killilerneqarmat.

Qinnutigisap aningaasat tunniunneqartut pillugit paasissutissamut killilerneqarnera paasinninneqarsinnaatitaaneq pillugu inatsimmi § 2, imm. 3-mut naapertuuttuusut nalilerneqarpoq.

Ataqatigiinneqarnermi tassani Steen Rønsholtp atukkiaani "*Forvaltningsret, Proces, Sagsbehandling*"-imi 2018-imeersumi qupperneq 28 assersuutitut innersuussutigineqarsinnaavoq, tassanilu atukkiortup Danmarkimi paasitinneqarsinnaatitaaneq pillugu inatsimmi § 21, imm. 2 Kalaalit Nunaanni inatsimmi aalajangersakkap assigisaa pillugu makku oqaatigai:

"Pissutsit akissarsianut tunngasut pillugit paasissutissani – tunngaviusumik akissarsiat paasissutigineqarnerisa saniatigut – paasissutissat qaangiuttoorneranianut, piuk-kunnaateqarnermut sulinermilu akissarsianut kiisalu soraarnermi ajunngitsorsianut soraarnerussutisianullu tunngasut pineqartunut aamma ilaatinneqarput. Paasitinneqarsinnaatitaanermi taamaallaat akissarsiat amerlassusii suussusiilu pineqartunut ilaatinneqarput, tunniussinermulli tunngaviusoq pillugu paasissutissat erseqqinnerusut – matumani soorlu soraarnermi ajunngitsorsiat pillugit isumaqatigiissuteqarnek ilanngullugu eqqarsaatigalugu – aalajangersakkami pineqartunut ilaatinneqaralik."

Tamanna innersuussutigalugu [A]-llu naammagittaalliuutaata aningaasat amerlassu-siannut ilumut killilerneqarsimanera innersuussutigalugu kommunip manna aallaa-vittut paasiuminaatsippaa, tassalu soraarnermi isumaqatigiissutip assilinera Ombuds-mandip piumasimagaa, isumaqatigiissutip imaa allagaatinik paasissutissiineri ilaa-titsisannginneq pillugu aalajangersakkani pineqartunut ilaatinneqarnerisooq naliliisoqar-nissaa siunertaralugu.

Soraarnermi isumaqatigiissut Ombudsmandi pillugu inatsimmi § 18, imm. 1 innersuus-sutigalugu kakkiullugu nassiunneqarpoq, nassuerutigineqarmammi kommuni Om-budsmandip isumaqatigiissummik tunniusseqqusinera naalassallugu pisussaaffeqar-toq.

[A]-p allagaatinik paasitinneqarumalluni qinnutigisaanik itigartitsinermut kommunip tunngavilersuutaanik itisiliineq

Eqqortussaq anguniarlugu oqaatigineqarpoq Ombudsmandip allagaani 26. november 2021-meersuni [A]-p allagaatinik paasitinneqarumalluni qinnutigisaa 28. juni 2021-meersooq innersuussutigineqartoq. Eqqortoq unaavoq [A]-p allagaatinik paasitinneqa-rumalluni qinnutigisaa 28. juli 2021-meersuusoq.

Kommunip naliliinera unaavoq [B]-p pisumi pineqartumi soraarnermut atatillugu ajun-ngitsorsiaasa aningaasartaasa qassiunerannik paasissutissaq paasitinneqarsinnaati-taaneq pillugu inatsimmi § 2, imm. 3-mi pineqartunut ilaanngitsoq, tassuunalu aala-jangersarneqarpoq *ateq, ilinniarsimasaq, akissarsianut tunngasut aamma sulinermut atatillugu angalasarsimanerit* pillugit paasissutissat paasissutissiissutigineqarsinnaati-tasasut.

Kommunip naliliinera unaavoq paasissutissat pineqartut nalinginnaanerusumik pissu-seqartut, taamaattumillu inuit ataasiakkaat aningaasaqarnerannut tunngasut (misik-karissut/isertuussassat) pillugit paasissutissanut attuumassuteqaratik. Pisortani ator-feqartitaasup isumaqatigiissut atuuttoq il.il. tunngavigalugit qanoq akissarsiaqarnera pillugu paasissutissaq paasissutissaagunanngilaq misikkarissoq/isertuussassaq.

Kommunilli soraarneq pillugu pisumi isumaqatigiissummi soraarsitsiniarluni suliap ingerlaloreerfigisimasaanut ilaasumi ajunngitsorsiat aningaasartaasa qassiunerat pillu-gu paasissutissaq nalinginnaasutut pissuseqanngimmat § 2, imm. 3-mi pineqartunut ilaanngitsutut isigigaa.

Pisortat ingerlatsinerat pillugu paasitinneqarsinnaatitaaneq pillugu Inatsisartut inatsi-saata allanngortinneqarneranik Inatsisartut inatsisaata nr. 1-ip, 31. maj 1999-imeer-sup (sulisorineqartut pillugit paasissutissanik paasitinneqarsinnaanermut tunngasup)

piareersarlugu suliarineqarnera suliaasimasut tamatumunnga atatillugu innersuussutigineqarput, tassaniulu ilaatigut makku oqaatigineqarput:

"Aalajangersagaq taanna malillugu siullermik paasissutissat "nalinginnaanerusut" arlallit inatsimmi pineqartunut ilaatinneqarput. Tassani pineqartut tassaapput atorfeqartup aqqa, atorfia, ilinniagaqarnera, suliarisartagai, akissarsiaanut tunngasut sulinermullu atatillugu angalasarneri pillugit paasissutissat."

Soraarnermi ajunngitsorsiat "akissarsianut tunngasuni" pineqartunut ilaatinneqartut piarersaalluni suliani kingusinnerusukkut oqaatigineqarnera kommunip eqqumaffigaa. Kommunili naliivoq tamanna taamaallaat atuuttoq soraarnermi ajunngitsorsiat aamma "nalinginnaasutut pissuseqarpata". Taamaattumik kommunip paasissutissat § 2, imm. 2-mi pineqartunut ilaatinneqartutut isigai.

Paasitinneqarsinnaatitaaneq pillugu inatsit atuuppat

Pisumi matumanisut ittumi soraarnermi ajunngitsorsiat amerlassusiat pillugu pasissutissaq paasitinneqarsinnaatitaaneq pillugu inatsimmi pineqartunut ilaatinneqartoq paasinarsippat kommuni allagaatinik paasitinneqarumalluni qinnutigisaq itigartissallugu pisusaaffeqarpoq, paasitinneqarsinnaatitaaneq pillugu inatsimmi § 12, imm. 1, nr. 1 imaattunik oqaasertaqartoq innersuussutigalugu:

"Paasitinneqarsinnaatitaanermi paasissutissat makku ilaatinneqanngillat:

1) inuit ataasiakkaat inuuneri pillugit paasissutissat, matumani aningaasaqarneranut tunngasut ilanngullugit, ..."

Aalajangersakkap taassuma Danmarkimi paasitinneqarsinnaatitaaneq pillugu inatsimmi § 30, imm.1, nr. 1 assigaa. Aalajangersagaq taanna pillugu oqaaseqaatit Karnovimiittut ilaatigut imaapput:

"Paasissutissat sorliit "pissutsinut namminerisanut" tunngasutut isigineqarnerannik naliliinermi paasissutissat pissusertik pissutigalugu inuiaqatigiinni nalinginnaasumik paasinnittaaseq malillugu tamanit ilisimaneqalinnginnissaat piumasqaatigineqarsinnaanersoq aallaavigineqartariaqarpoq. Taamaalilluni imaanngilaq pisumi paasissutissat suullunniit pissutsinut inuup pineqartup atugaanut tunngasut aalajangersagaq taanna inatsisikkut tunngavigaugu ilaatinneqanngissinnaasut. Paasissutissaq allagaatinik paasissutissiinermi ilaatinneqanngissinnaanersoq naliliinermi paasissutissaq pineqartoq ataatsimut isiginninneq aallaavigalugu qanoq pissuseqarnermi tunngavigalugu pissutsit inuup pineqartup nammineq atugai, matumani aningaasaqarnermut tunngasut ilanngullugit eqqarsaatigalugit, pillugit paasissutissanut tunngasuunersoq taamaalilluni aalajangiisuvoq."

Kommunip naliliinera unaavoq pisumi pineqartumi soraarnermi ajunngitsorsiat aningaasartaasa qassiunerat pillugu paasissutissaasoq [B]-p nammineq aningaasaqarneranut tunngasoq.

Soraarnermi ajunngitsorsiat pisumi soraarsitsinermik inernilerneqarsinnaasumi isumaqatigiinniutigineqartut qassiunerat pillugu paasissutissaq paasissutissaavoq nalinginnaasuunngitsoq, pissutsinut inuup pineqartup atugaanut aningaasaqarneranullu erseqqissumik atanilerneqarsinnaanngitsoq.

Isumaliutersuutit taakku aningaasat qassiunerannik paasissutissaq isertuunneqasasoq kommunip [B]-llu soraarnek pillugu isumaqatigiisummi aalajangersakkamik ilanngussisimanerannut tunngaviupput. Oqartussaasup isertuussisoqarnissaanik ki-naassutsilluunniit isertuunneqarnissaanik nalinginnaasutigut neriorsuisinnaannginnera, neriorsuisimanerlu innersuussutigalugu neriorsuinerup qanoq annertutiginnera pillugu paasitinneqarumanemik itigartitsissutiginnissinnaannginnera kommunip eqqumafigaa. Pisumili pineqartumi isertuussinissamik neriorsuisimaneq (annertungaatsiartumik) pingaaruteqartillugu isiginiarneqartariaqarpoq.

Kommunip paasinninnera aamma unaavoq paasissutissat pisumi pineqartumi paasitinneqarsinnaatitaaneq pillugu inatsimmi § 13, imm. 1, nr. 6-imi imaattunik oqaasertaqartumi pineqartunut ilaatinneqartut:

"Paasitinneqarsinnaatitaaneq killilerneqarsinnaavoq, tamanna pisariaqarpat makku immikkut eqqarsaatigineqarnissaasa illersorneqarnissaannut:

6) namminersortut pisortallu soqutigisaat, pineqartup pissusia immikkut ittoq pissutigalugu isertuussinissaq pisariaqarpat."

Aalajangersakkap oqaasertalerneqarnerata manna nassataraa, tassalu paasissutissanik ilaatitsinnginneq taamaallaat pisumi naliliinikkut pisinnaasoq. § 13, imm. 1, nr. 6 tunngavigalugu naliliineq tassuuna ilaatitsinnginnernit paasissutissanut allagaatinullu aalajangersimasunut tunngasunit allaaneruvoq.

Kommunip naliliinera unaavoq suliami pineqartumi soraarnermi ajunngitsorsiat aningaasartaasa qassiunerannik paasissutissap tamanut saqqummiunneqarnera naleqquttuunngitsoq pitsaasuunanilu. Kommuni pisumi pineqartumi [B]-p aviisitigut eqqartorneqareersimanera isiginiarlugu naliliivoq paasissutissat innuttaasuni aalassassimaarnermik [B] eqqarsaatigalugu pitsaanngitsumik pilersitsisinnaasut.

Ataqatigiinneqarnermi tassani Kalaallit Nunaanni innuttaasut ikittunnguunerat Kalaallillu Nunaanni pingaartumillu Nuummi innuttaasut amerlanersaasa Lars Møller-Søren-

senip kinaaneranik ilisimasaqarnerisa ilisimasaqarnissaasaluunniit ilimagisariaqarnerat isiginiarneqartariaqarpoq.

Aalajangersagaq suna allagaatinik paasitinneqarumanermik itigartitsinermut tunngaviuva

Qulaani oqaatigineqartunit ersertutut Kommuneqarfik Sermersuup naliliinera unaavoq pisumi soraarnermi ajunngitsorsiat soraarsiniarnerup ingerlalereerfiani isumaqatigiinniutigineqarsimasut pillugit paasissutissaq paasitinneqarsinnaatitaaneq pillugu inatsimmi pineqartunut ilaasutut isigineqarsinnaanngitsoq, paasissutissarmi taanna § 2, imm. 3-mi pineqartunut ilaatinneqanngimmat.

Kommunilli tamatumunnga peqatigitillugu naliliinera unaavoq paasissutissat paasitinneqarsinnaatitaaneq pillugu inatsimmi pineqartunut ilaasutut isigineqarunik paasitinneqarsinnaatitaaneq pillugu inatsimmi § 12 paasissutissiinermi paasissutissanik/allagaatinik aalajangersimasunik ilaatitsinnginnissamut tunngaviusoq aamma § 13 paasissutissanik, pisumi pineqartumi tamanna ilaatigut namminersortut soqutigisaat pingaaruteqartut mianerineqarnissaat eqqarsaatigalugit pisariaqarpat, allagaatinik paasissutissiinermi ilaatitsinnginnissamut tunngaviusoq tunngavigalugit ilaatinneqanngis-sinnaallutillu ilaatinneqanngitsussaasut.

-----0-----

Illassutaasumik nassuiaat manna kommunip nassuiaataanut 3. november 2021-meer-sumut ataneqarteqqissaarlugu isigineqassaaq.” (Ombudsmandeqarfirmi nutsigaa-voq)

MALITSEQARTITSINEQ

E-maili Kommuneqarfik Sermersuumit 18. maj 2022-mi tiguara. Kommuni imatut allappoq:

“Ombudsmandip kommunimi siusinnerusukkut pisortaanerusimasup soraarnermini a-junngitsorsiai pillugit allagaatinik paasissutissiineq pillugu aalajangiinera tusaatissatut tiguarput.

Paasissutissat naammagittaalliortumut [A-mut] nasiuppavut.” (Ombudsmandeqarfimmi nutsigaavoq)

Kommuneqarfik Sermersooq 24. maj 2022-mi nalunaarfigaara kommunip akissutaa tusaatissatut tigugiga suliarlu inaarlugu suliaralugu.